

Filastrocca asgiulella

Mela rossa, mele d'oru
Cesta piena, cesta viota
Salvatichezza ma tesoru
Hè manu stretta chi vi porta

Caspe di luce, sole di suchju
Gocce sanguine, gocce gialle
Bigonzulate, licor' di muchju
Acellu ghjornu hè stancu d'ale

Notte pinnuta vi si posa
Cù e lenzole à lenze scure
Conche negrone, stella ascosa
Ci luccichjehja, crosce fiure

D'acquate lisce à corri corri
Sopr' à scalucce di matticiu
Murze scaldate à cent'amori
Di grilli tonti à passu spicciu

È po di baffe ballarine
Nant'à chjappelle terra sonnu
Candelle fresche l'andarine
À visu perla chjar' di ghjornu

Fiore famitu d'apa fulena
À fiancu dolce di villutu
À zampe zuccheru catene
Di vita nova, hè bocchimutu

U sempre di l'eternità
L'eternu sguardu di u sempre
Chì pare sempre guaità
A vita sfilà eternamente.



T'aspettu

T'aspettu
Di pettu à tempu
Duv'impetta l'amore
T'aspettu è lu mio pettu
Palpiteghja à dolore

D'aspettà
Ti ripetu sò stanca
Ùn ci hè più chè dispettu
Di pettu à iss'ora scianca
Chì s'hè messa à l'aspettu

Aiò, ch'aspettendu
Ùn mi rispettu più

È mi strappu pensà
A ferita s'è tù
Ch'ùn possu smenticà

Aiò chì l'aspettà
Hà mucate e mio brame
Intreccendu fattoghje
À capelli di chjame
Cascati à pienghjulà

Sò eo aspettatrice
Chì maneghja l'angoscia
Sulenna spettatrice
Di l'amarezza loscia

Aspettu è morgu appena
Riveni mi per pena...

